



UNIVERSITÄTS-
BIBLIOTHEK
PADERBORN

Universitätsbibliothek Paderborn

**R. P. Sebastiani Henrici Penzingeri, Consistorialis
Passaviensis, Decani, & Parochi in Trauttmanstorff ad
Laitam Bonus Ordo Triplicis Formatae Concionis Moralis In
Omnia Festa Sanctorum In Amplissima ...**

Penzinger, Sebastian Heinrich

Solisbaci, 1698

Concio Secunda. Textus: De qua natus est Jesus. Thema: Sine macula est
Maria, quia singulariter præventa.

[urn:nbn:de:hbz:466:1-51763](https://nbn-resolving.org/urn:nbn:de:hbz:466:1-51763)



IN FESTO IMMACULATÆ
CONCEPTIONIS
CONCIO SECUNDA.

Textus. De qua natus est JESUS. Matth. I.

Thema. Sine macula est Maria, quia singulariter præventa.

Memorandum.



Epiphanius Serm. de Laud. B.V. variis honorum titulis Mariam Virginem deprædicat: Vocat illam *Lampadem cæli*, lucem gestans *inextinguibilem*, sole splendidiorem; *Urnâ auream*, continens in se *Manna cæleste*. *Mare Spirituale*, habens in se *gemmam cælestem Christum*. *Splendidum cælum*, *imprehenabilem* portans Deum. Mariam vocat Richardus à S. Victore cap. 23. in Cantic. *Paradisum*, de qua *fontis egreditur gratiarum*. Hugo de S. Victore Serm. 34. de institut. monastica, maximis encomiis Mariam deprædicat: *Maria Virgo* verè est *aurora clarissima*, quo suo *magnifico jubare præcedentem Patrum claritatem innovavit*. Est ergo *aurora vera lucis præventione*, *flos pulchritudine*, *savus dulcedine*, *viola humilitate*, *rosa Charitate*, *lilium suavitate*, *vitis fructificatione*, *quodvis aroma*, *bona opinione*; *Castrum in securitate*; *murus & turris in fortitudine*; *propugnaculum defensione*; *columna reëctitudine*; *Sponsa fidei*; *amica dilectione*; *mater fecunditate*; *Virgo integritate*; *Domina dignitate*; *Regina Majestate*; *Ovis innocentia*; *Agna mundicie*; *columba simplicitate*; *Turtur Castitate*; *Nubes protectione*; *Luna augmentatione*; *Sol consummatione*; *Paradisus plenitudine*; egregie Idiota de contempl. B.V.c.2. *Quodcumque donorum alicui sanctorum unquam datum fuit,*

fuit, tibi non fuit negatum, sed Sanctorum omnium privilegia, omnia habes in te congesta, nemo equalis est tibi, nemo major nisi DEUS. Hæc est incorrupta illa terra, loquitur de B. Virgine S. Bruno in Psalm. 101. Cui benedixit Dominus, & ab omni propterea peccati contagione libera, per quam vitæ viam agnovimus, & promissam veritatem accipimus. Unde S. Gregorius Neocæs. Or. 2. meritò simulacrum immaculatum puritatis, & integritatis Mariam dicit. Divina S. Spiritus gratia implorata Conceptibus probabo.

CONCEPTUS I.

Arcam illam, quæ naufragantē mundo Noëmo portum attulit: B. Virginem Mariam sine macula conceptam figurasse, nemo ambigit: Ita Hesichius, hom. de Deip. *B. Virgo est Arca, Arca Noë latior, longior, illustrior; illa erat animalium Arca, hæc autem Arca vitæ; illa corruptibilium animalium, hæc incorruptibilis vitæ, illa Noë, hæc vero ipsius Noë factorem portavit; illa duas, & tres contignationes, & mansiones habebat, hæc autem universum Trinitatis complementum.* De Arca Noë nunc varia observanda veniunt. Primò: Ex lignis talibus compacta fuit, quæ minimè per aquas corrumpuntur, ut sunt ligna cedrina. Secundò: Ab infra, tam ab extra Arca linita fuit; Item non in modum navis, sed in modum Domus undique tecta, & clausa fuit, ut neque inferius, neque superius gutta aquæ Arcam penetraret, madefaceret, vel tangeret. Tertio: Quò magis aquæ multiplicarentur, & excreverent, eò magis Arcam in sublime elevaverunt. Hæc omnia congruunt Virgini Mariæ; Ex incorruptibilibus lignis fabricata est Arca hæc: *Quasi cedrus exaltata sum in libano.* Eccles. 24. Quasi cedrus, corruptioni minimè subjacens: Undique clausa est hæc Arca, Virgo Maria; *Hortus conclusus, fons signatus.* Cant. 4. Unde nec gutta diluvii peccati Originalis intravit, teste Sponso Cantic. 4. *Tota pulchra es amica mea, & macula non est in te.* Nocuerunt aliis aquæ diluvii peccati originalis, ac planè obruerunt, Maria Virgo his procellis semper existit superior, in apice divi-

narum gratiarum collocata; *Ab aeterno ordinata sum, inquit, & ex antiquis.* Maria ergo immaculata est.

CONCEPTUS II.

Dilectus in Cantic. Mariam Columbam nominat: *Una est columba mea.* Can. 6. Columba utique Noetica, uti eam compellat S. Bonaventura in spec. lect. 9. *Tu es illa fidelissima columba Noë, que inter summum Deum & mundum diluvio spiritali submersum, mediatrix fidelissima exististi.* De columba Noëtica legitur, quod extra Arcam pes ejus non quieverit, quod super nullam arborum, ac frondium resederit: *Cum non invenisset pes ejus, ubi requiesceret, reversa est ad eum in Arcam,* Genes. cap. 8. Et cur columbula illa non sedit, non quievit super unum ramusculum, vel frondem, ut alias hoc genus avium assolet? Advertit Lyranus, quod omnes arbores, & frondes, à generali diluvio, sordibus, luto, ac fœcibus infecti, inquinati fuerint; non resedit ergo super ramum sordibus infectum, ne inquinaretur, sed immaculata maneret; Verba Lyrani sic sonant: *Dicendum, quod ex diuturna mora aquarum super terram, non erat desiccata adhuc, sed erat quasi lutum, in quo non libenter quiescit columba.* Columba Noëtica est Maria, propterea, quod super lutum peccati ne momento quidem resederit, sola, & unica à peccato Originali, à sordibus Adæ, immunis, & purissima permanserit, immaculata semper. Hoc indicare intendit Sponsus adeò dilectæ suæ, quæ Maria est, pedum pulchritudinem laudando.

CONCEPTUS III.

Quàm pulchri sunt gressus tui in calceamentis, filia Principum. Cantic. 7. Cur quæso à pedibus, à gressu sponsa deprædicatur? Notare libeat; per pedes, & gressus, PP. intelligere peccatum Originale, quod malos affectus, ac inordinatos appetitus post se trahit, ac omnes homines malè ordinatis passionibus inquinavit, juxta Psalm 48. *Iniquitas calcanei mei circumdabit me.* Hinc Christus discipulorum suorum lavit pedes, non verò legitur lavisse pedes Mariæ Virginis; cur hæc à lotionem pedum excluditur? Audia-

Audiamus quid Christus dicat Petro : *Qui lotus est, non indiget, nisi ut lauet pedes*: desuper S. Ambrosius : *Plantam lavare debebat, habebat enim primi hominis de successione peccatum, quando enim supplantavit serpens, & persuasit errorem, idè plantam ejus abluatur, ut hereditaria peccata tollantur.* Maria ergo à lotione pedum excluditur, imò à gressu, à pedibus laudatur; ad innuendum; à peccato Mariam immunem esse, primum instans conceptionis, primus ingressus Mariæ in hunc mundum, jam pulcher fuit, ac mundus à fordibus peccati Originalis, ita concludit conceptum hunc Simmachus : ita ex Hebræo, textum: *Quàm pulchri sunt gressus &c.* vertendo : *Quàm pulchri sunt primi gressus tui.* Salomon. teste Prov. c.7. *Via ejus via pulchra, & omnes semite illius pacificæ,* id est: inquit Richardus à S. Laurentio : de laud. V. *Munda à peccato.*

CONCEPTUS IV.

In Universalis diluvio omnes creaturæ interierunt, præter Olivæ ramum, Genes. c. 8. *At illa, columba nempe: Venit ad illum ad vesperam, portans ramum Olivæ virentibus foliis in ore suo.* Desuper S. Ambrosius lib. de Noë & Arca : *Gavisus est vir justus videns fructum de veteri semine aliquem reservatum, & inde collegit misericordie divinae insigne, quod fructum demonstrasset, cui non potuissent nocere diluvia.* Spiritus S. Eccles. 24. de Maria inquit: *Quasi Olivæ Speciosa in campis.* Speciosa dicit, semper munda, semper candida, pura absq; maculâ. *Quemadmodum igitur in Universalis diluvio omnes reliquæ arbores perditæ sunt, excepto Olivæ; ita omnes creaturæ rationabiles, in diluvio peccati Originalis interierunt, sola Maria, mystica Olivæ excepta, quam omnipotens Deus ab instanti conceptionis suæ præservavit; patet ulterius ex Prophetiâ Danielis cap. 4.*

CONCEPTUS V.

Imperatum est à divina Justitia : *Succidite arborem, & prae-
dite ramos ejus, & excutite folia ejus, & dispergite fructus. &c.*
Verumtamen germen radicem ejus in terra sinite : Arbor hæc
humanum genus est, rami, folia, & fructus, sunt Dei dona &
D 3 gratiæ

gratia. Has, & hæc omnia perdidit Adam ob peccatum, succifa est arbor, concidit humanum genus peccato originali; Radix tamen & germen humani generis illæsum mansit, huic parcitum est. Sed quis dicet, quæ est illa radix, & germen, quod in excidio universalis diluvii, Originalis peccati, conservatum est? dicit & nominat germen hoc Isaias cap. 11. & est sacratissima Virgo Maria: *Egredietur Virga de radice Jesse, & flos de radice ejus ascendet, & requiescet super eum Spiritus Domini.* Germen, radix humani generis Virgo MARIA ab interitu, ab excidio conservata est, Adæ peccatum non incurrit, immaculata permanfit, ac illæsa.

CONCEPTUS VI.

Miraculum audite Numerorum cap. 7. Virga Aaron floruit, ac amygdalas fructificavit: *Invenit germinasse virgam Aaron in domo Levi, & turgentibus gemmis eruperant flores, qui foliis dilatatis, in amygdalas deformari sunt.* S. Cyrillus Jerof. Ephrem de laud. B. V. Item Bernardus super missus. In i Ia Virga Aaron, Mariam Messæ Matrem intelligunt, & observant, quod Virga Virginem designans debuerit esse ex amygdalo: Cur ex amygdalo? Amygdala volunt naturalistæ, ante omnes alias arbores floret, dum reliquæ arbores adhuc nudæ, & aridæ, ab hyeme afflictæ consistunt, amygdala albedine florum compta, & candida resplendet, sicque omnes alias arbores virore, & flore præcedit. Pariter B. V. primo Conceptionis suæ instanti effloruit, venustaque, ac florens apparuit, eo tempore, quo cæteri Adæ posterii, nudi & aridi exlitterunt. Maria ergo sine macula.

CONCEPTUS VII.

Quærit Jeremias cap. 18. *Nunquid deficiet nix de Petra Libani?* Libanus Mons, idem significat, inquit S. Hieronymus, quod Candidatio. Nix à natura alba, & candida est, per nivem ergo, & montem Libani, Mariæ immaculatam conceptionem, candorem, & puritatem intelligendam esse, vult Hieronymus in cap. 4. Cantic. ita Serm. de assumpt. *Nihil est Candoris, nihil est splendoris, quod non resplen-*

resplendeat in Virgine gloriosa. Erat enim candidata multis meritum virtutibus, & dealbata nive candidior, Spiritus S. muneribus simplicitatem columba in omnibus representans. Ast, cur puritas, albedo, candor, ac innocentia Virginis, non aliis rebus candidis, ut bysso, papiro, sed rectè nivi, ac Libano semper albo à nivibus comparatur? Candor byssi, papiri, non est candor innatus, ast candor nivis à natura est talis, nix candida concipitur, generatur, candida spargitur, candida in terram descendit. Candori ergo nivis, non byssi, aut papiri congruè MARIA comparatur, quia nunquam sub tetro, & fulco Originalis culpæ colore fuit, sed candidissimum colorem innocentiae semper habuit, ab origine candida, pura, immaculata fuit: Ita Bernardinus de Busto in Mariali: Part. 9. Serm. 29. in festo nivis: Per albedinem Nivis figuratur innocentia, & puritas immaculatae Virginis, quae nunquam fuit maculata, vel denigrata per peccatum.

Imploremus ergo B. Virginem, ut Abraham olim Saram: *Novi Epilogus.*
quod pulchra sis, pulchra, immaculata; dic ergo coram tremendo
Judice quod soror mea sis, ut mihi peccatori
benè sit propter Te immaculatam.

Amen.



IN